



Шочмо эл, порылык да чын верч!

1-ше (3752) №,
2026 ий 9 январь,
кугарня



0+

1933 ий 1 февраль годсек лектеш.

Тул Имньылан почна капкам



2026 ий мыланна ший кап-кажым почо. Ужар Пу Кишке дене чеверласен, Йошкар Тул Имне кудал пурыш. Чулым, писе, ончыко вудышö, пашам ышташ таратыше, вий-куатым ешарыше. Ожно калык тыге ойлен: «Имне – чыла-лан негыз. Имньыдыме лият гын, шуко азапым ужат». Ты вольык чыла гаяк неле пашам ыштен, садлан тудым тачат пагалат. Имне мыланна эрыкым, чытышым пöлекла, күлеш годым кеч-могай сомылым жапым шуйкалыде ышташ туныкта.

«Имне – айдемын йолташыже», – тыгеат ойлат. Тудо мемнан гаяк ушан, умылен, кумылым шижын моштышо. Теве Оршанке район Кугунур села гыч Жанна Владимировна ден Игорь Витальевич Смирновмыт коло ий наре имньым ашнат да тудым лишыл йолташыштан шотлат. Ача-аван йöратымашышт икшы-вышт-влаклан куснен. А нуно шке йочашт-шамычын чонышкышт ты шижмашым шындареныт. **Снимкыште** Кристина Игоревна ден Настя ўдыржым Мансура лўман имне дене пырля ужда.

– Имньым изинек йöратем. Нуным пукшем, кушкыж кудалыштам. Имне идалык толмылан моткоч куаненам. Ныл йолан йолташлан кугурак тўткышым ойыраш сай амал, – ойла Настя Смирнова.

*Умбагыже –
2-шо лаптыкыште.
Фотом еш архив гыч налме.*

2026 ий –
Калык-влакын икоян
улмо идалыкышт.

Виян да куатан элна

Шуко шорынан, кумда, сөрал элна,
Тый улат ачана, авана!
Ешла тыште ме келшалам илена,
Ойго ден куаным лош ме пайлена.

Ю семан ший мурым мурена,
Пашамат пырля лач ыштена.
Пұрымашна сото, пиалан,
Тыланем чылалан волгыдо кавам!

Руш, татар, марий, чуваш –
Тиде поро келшымаш.
Одо, коми да молат...
Курымла мемнам ушат.

Ме руш йылмым палена чылан,
Шочмо йылмымат вияндыман.
Чот тыршен ме тудым шымлена,
Ава семын йылмым аклена.

Икоян лиеш эре тек сылне Россияна,
Да мемнам шке йырже
чумырен мошта.
Пұрымаш кеч түрлө калыкнан,
Улына садак виян да куатан.

Валерия АЛЕКСАНДРОВА.
Морко, Унчо.

Тул Имньылан почна капкам

Тўналтышыже –
1-ше лаштыкыште.

Смирновмыт кандаш имньым
ашнат: Бунчук, Звезда, Мансура,
Амелия, Замбия, Марибель, Ве-
нера да Бизель. Кажныже ойырте-
малтеш. Мутлан, Бунчук – ожо,
тыматле, шкенжым кучен мош-
та. Мансура икшыве-шамычым
йората, арам огыл йоча-влак ту-
дым кушкыж кудалыштыт.

– Артем эргына шым ияш ул-
мыж годым имньым йодын. Ма-
шинам ужален, чомам налын-
на. Вологда лўман ыле. Эргына
имне спорт дене кылым кучаш
тўналын. Вара Воронеж об-
ластысе имне заводышто ту-
нем толын. Тапасымашке кош-
таш тўналын, селымашыжат
ятыр. Сарзе пашам ойырымыж-
лан кўра ты сомылым орды-
жеш коден. Ожно спортивный
урлык имне лийын гын, кызыт
владимирский тяжеловоз урлы-
кым ашнана. Ынде имньым тех-
нике алмаштен гынат, патыр
вольыклан пашам изиш ыштык-
тена, – ойлат Жанна Владими-
ровна ден Игорь Витальевич.



Алёна ТИМОФЕЕВЫН сўретше.
Волжский, Сотнур.

Верысе йоча-влак имньын мо-
торлыкшым ончаш чўчкыдын
коштыт. Вольык дене вашкылым
муаш тунемыт, ешартыш шинчы-
машым налыт. Шукуштыт кушкы-
жыт, тазалыкыштым пенгыдемдат.

– Имне айдеме гай, шинчаш-
кыже ончалат – чыла умы-
лаш лиеш. Тудат мемнам ши-
жеш, – ешарыш озавате.
Христина АЛЕКСАНДРОВА.



Кож ончер

Пайрем кумылым пуртышо,
шке йырже йоча-влакым чумы-
рышо, шинчаончалтышым ку-
андарыше пушенге – кож. Иман
укшыжым шаралын, шкеж деке
кажне еным савыра. Тек тудо
виянеш да пўртўс лонгаште ум-
бакыжат кушкеш. А У ийлан ис-
кусственныйым шогалташ лиеш.
Ты шонымаш дене Йошкар-Ола-
се йоча экологий да биологий рў-
дер «Ёлочка, живи!» республи-

канский конкурсым да ончерым
эртарен (снимкыште). Школ лес-
ничестве-влакын уста ўдыр-рве-
зыже-шамыч, пўнчō пўгыль-
мым, куэмым, кагазым да эше
шуко вес арверым кучылтын,
мотор кожым ыштеныт. Тыгак
СВО-што улшо салтак-влаклан
открытым ямдыленыт.

Оля МАЙКОВА.
Фотом рўдерын «ВКонтакте»
воткылысе тўшкаж гыч налме.

Вучымо У ий

Толын шуын ший У ий,
Йырымваш ош лум да ий.
Кожым мўнгтō конденна,
Ах, мотор пушенгына!

Мый У ийым вученам,
Юзо шўлышым шижам.
Изижат да кугужат
Ты пайремым йоратат.

У ий дене саламлем,
У пиалым тыланем!
Имньым ме вашлийынна,
Порым веле вучена.

Диана ТОЙБАХТИНА.
У Торъял, Тошто Торъял.

Тушто

Лыве семын кўшнō пўрдыт,
Кидкопашке эркын возыт.
Тўсышт ошо, чылт пор гай,
Мо гын тиде, кō пала?



Йомакыш логалынам

М.Шкетан лүмеш Марий драме театрыште эртаралтше У ий пайремыш авам намиен. Тушто мемнам Лум-удыр (снимкыште), Шрек, Ишак, Шамахан царице, Юлий имне шокшын вашлийынт. Түрлө модыш дене модыктеныт, марий да кызытсе жапыште кумдан палыме мурсем почеш куштыктеныт. Усталыкем йомакысе Ишак шекланен да мокталтен. Умбакеже Йүштö Кугызам ружужынна. Тудо кожым түрлө тусан гирлянде дене волгалтарен, мыланна юзо вийжым ончыктен.

Пайремысе герой-влак дене черверласымеке, «Волшебная лампа Аладдина» спектакльыш ұжыныт. Артист-шамыч шке рольыштым моткоч мастарын модыныт. Ты постановкышто чылажат сöрал ыле: костюм, декораций, музыка. Мылам Джин моткоч келшен. Пайрем весела кумылым пöлеклен.

София ГОДУНОВА
Медведево, 6-шо номеран
«Онтыр» йочасад.
Фотом еш архив гыч налме.



Түшка пашан лектышыже

Кишке ийым у сёгымаш дене ужатышна да Имне идалыкым у шонымаш дене вашлийна. Йошкар-Оласе Бауман лицейште 10-шо медиаклассыште тунемше удыр-рвезе-влак «PRO ЛБ» школ газетын икымше номержым савыктен лукна (снимкыште). У пашам тўналме годым чон эре тургыжлана. Тиде проектым илышыш ворандарен шукташ манын, кок тылзе тыршышна, паша кўжгö лийын. Икымше номерым ямдылымашке 30 утла ен ушнен. Мыланна наставникна Ирина Вячеславовна Москвина чот полшен. Эре пеленна лийын, йонгылышым жапыштыже коранден. Газетыш возышаш темым рашемдымаште шуко ой-канашым пуэн. Ме Ирина Вячеславовна дене кугешнена да таумутым ойлена. Ямде материал-влакым газет лаштыклаш верандымаште «Ямде лий» газетын дизайнерже

Элина Ямбаршева кугу пашам шуктен. Декабрь тўналтыште газет 500 экземпляр дене савыкталтын. У ий вашеш мыланна, ача-ава, туныктышо-влаклан чапле пöлек лийын, шонем.

Газетышке Бауман лицейын илышыж гыч эн онгай да кўлешан увер-влакым верандыме. Уста тунемше-влак дене интервью лудаш лиш. Спортсмен ден сўретче-влак професийым ойырен налме шотышто ой-канашым темлат. Моло рубрик-шамычмат келыштарыме.

«PRO ЛБ» тиде тыглай газет гына огыл. Тиде медиаклассыште тунеммашын паша лектышыже, мастарлыкым ончыктымаш, лицей илыш дене палдарымаш. Икманаш, черетан сёгымаш! Тўшкан ыштыме паша эре кугу лектышан!

Юлиана КУРОЧКИНА.
Авторын фотожо.

Руж ушненыт



Школышто У ий пайремым пеш веселан эртарышна. Имне идалыкым спортышто, тунеммаште сёгымаш дене вашлийна.

Марий кечышотымат радамлена. 2026 ий Шыншалын идалыкше лиш. Тудо 22 мартыште тўналеш. Тидын лүмеш республикыште «Шыншале» У ий гирлянде» акций эртаралтын. Морко район Энгерсола школышто тунемше орлята-шамычат (снимкыште) тушко ушненыт. Пашам руж ыштеныт: икте сўретлен, весе чиялтен, кумшо пўчкөден. Шкешотан шыншале гирлянде у ий кожым сылнештарен.

Галина СОШИНА.
Авторын фотожо.

Лум мөчöрым утаренна

У ий толын шуын. Тудым эн ончыч йочасадыште вашлийынна (снимкыште). Ёдыр-влак лум пырче, рвезе-шамыч чодырасе янлык лийынна. Мемнан деке унала лум мөчөр толын. Тудо шокшо пöлемыште пеш ырен да шулаш тўналын. Утараш манын, мурым муренна, куштенна, почеламутым каласкаленна. Лумёдыр ден Йўштö Кугызам полшаш йодынна. Лўддымö, поро, мастар улмынам ача-ава-влак йöратен онченыт. А юзо коча кажнылан шере пöлекым кучыктен.

Милена МАЙКОВА.
Йошкар-Ола, 53-шо номеран «Изи патыр» йочасад.
Фотом еш архив гыч налме.



Ош теле

Шыже шортын чеверласыш.
Теле мландым ошемден,
Чал пораным тудо кондыш,
Ерым ий ден комыжлен.

Таче ме коньким кычкенна,
Ер ўмбаке вашкена.
Ўдыр-шамычым вашлийна:
– Ош лумьенгым ыштена.

А меран, чот йўштым шижин,
Сур ужгажым ошемден.
Ок уж ынде пире тудым,
Лумла, порла койылда.

Андрей УШКОВ.
Волжский, Сотнур.

Йўштö Кугызан илемже



Йоча-влакын чот йöратыме Йўштö Кугыза Великий Устюгышто ила. А мемнан мариЙ Йўштö Кугызана уло. Тудо Шернур район Кукнур кундемеш верланен. Илемжым ончал савырнаш манын, класс дене экскурсийыш миенна. Мыланна йомак йолгорно дене эрташ келшен. Тўрлö герой дене вашлийынна, заданий-влакым шуктенна. Тунам веле Йўштö Кугыза мемнан деке толын. Чынжымак, илемыште юзо шўлыш озалана. У ий толмым шижтара.

Дима УХОВ.
Йошкар-Ола, 7-ше номеран школ.
Снимкыште: мый да Паша шолыым –
Йўштö Кугызан илемыштыже.
Фотом еш архив гыч налме.

Поро шарнымаш

У ий – эн вучымо, поро пайрем. Тудо мыйым куандара. Йўштö Кугыза окнаш тўрлö тўрым сўретла. Ончен öрат. Пöртыштö кож ден мандарин пуш озалана. Пайрем нерген шижтара. У ийлан мый Лумёдырын вургемжым ямдыленам. Тудым ший чинче-влак дене сöрастаренам.

Настя ТИМОФЕЕВА.

У ий пайрем йомакым ушештара. Чыла вере мотор, юзо шўлыш озалана. Мыят йомакым йöратем. Льюис Кэрроллын «Алиса в стране чудес» книгаже келша. Алисан вургемже пеш мотор. У ий пайремлан мыят тудын гай тувырым чиенам.

Алиса КОМАРОВА.

Пайрем фейерверкым куанен эскеренам. Иктыже весыж деч мотор. У ий йочан шукертсек шонен коштымжым шукта. Мыйынат тыгак лийын. Йўштö Кугызалан да ешлан тауштем.

Даша ПЕТРОВА.
Морко, Коркатово.

Куандарыше пöлек

Тений серышым мариЙ Йўштö Кугызалан возенам. Тудын илемже Шернур район Кукнур селаште верланен. Идалыкысе лектышем нерген серенам. Эльдар ден Рома шольым-влак сайын возен огыт мошто, садлан нунын лўм денат пöлекым йодынам. Мыланем гын, канцеляр сату-шамыч келшат. У мотор блокнот, тўрлö тўсан ручка ден карандаш-влак, пенал да молат. У ий йўдым Йўштö Кугыза кож йымаке лач тыгай на-



Кöлан **Йўштö Кугызалан**

Кушко **МариЙ Эл Республик**

Шернур район

Кукнур села

Индекс 425467

борым пыштен. Моткоч йывырте-на. Юзо коча шольым-влакымат куандарен.

Элеонора НИКИТИНА.
Морко, Купсöла.

2026 ийлан йоча гороскоп

Шорык (21.03-20.04)



Чолга да
лүддымө
улыда.
Кумды-
кым шым-
лаш йөрате-
да. Йолташда-влак дене
походыш миен толза. Ту-
неммашланат тўткышым
ойырыза.

Презе (21.04-20.05)



Чыла шот да рат дене
ыштым йөратеда. Ре-
жимым эскереда. Тетра-
дыштыда заметке-влакым
ыштылза. Тыге күлеш
материалым шар-
нен кодаш кустыл-
гырак.

Йыгыр (21.05-21.06)



Чыла па-
лен налаш
да шуко
вере шуаш
тыршеда.
Пазлым погаш да уш-акыл
пұсылыкым вияндыше мо-
дыш дене модаш йөратеда.
Тўналме сомылым мучаш
марте шуктыза.

Рак (22.06-22.07)



Шижын моштышо, тўт-
кө улыда. Кумылда вашке
тодылалтеш. Спорт дене
кылым ку-
чымаш чо-
ным лып-
ландараш
полша.
Ешлан
энертыза.

Лев (23.07-23.08)



Лидер койышда
изинек палдыр-
на. Моктым
йөратеда. Поро
кумылым ончык-
тым пашаш ушны-
за: илалшылан полшыза,
кайык үстелым ыштыза,
волонтёр семын түрлө меро-
приятыйыште чолга лийза.

Ўдыр (24.08-23.09)



Арулыкым йөратеда. Ту-
немме үстелыштыда кажне
арверын – шке верже. Тений
шке вийдам
түрлө таңа-
сымаште тер-
ген ончыза.
Шўдыр-влак
сенгымашым
сöрат.

Виса (24.09-23.10)



Пұсö уш-акыл да
чолгалык кугу
кўкшытыш
шуаш пол-
шат. Чыным
йөратеда.
Йолташда
шуко. Тўшка
модмашке утла-
рак ушныза.

Скорпион (22.10-22.11)




Оптимист улыда. Эре
ум кычалыда. Тўр-
лө могырым
шуаралты-
да. Школ
пеленысе
кружокыш
ушныза.
Шке вийлан
ўшаныза.

Пикшызе (23.11-21.12)



Эре ончыко.
Ты ой дене
келшен
иледа. Те-
ний йот
йылмым
куштылгын
тунеммаш тўгалы-
да. Тазалыклан тўткышым
ойырыза.

Ирказа (22.12-20.01)



Туштым йөратеда. Эре
ум пален налаш тырше-
да. Шочмо кундемда дене
кылдалтше
шымлыме
пашам возы-
за. Вийдам
конференци-
йыште тергыза.

Вўд йоктарыше (21.01-20.02)



Ўшанле улыда.
Тўрлым шон-
калымыда
тунеммаште
чаракым ыштен
кертеш. Темым
умылен шуктен огыдал гын,
туныктышо деч ушештараш
йодса.

Кол (21.02-20.03)



Лыжгалык да
порылык дене
ойыртемал-
тыда. Сўрет-
лаш, мураш,
кушташ йөрате-
да. Усталыкым вияндаш
йөн ятыр. Ача-ава деч по-
лышым йодса.

Тумнан ушан полышкалышыже

Йомак

Чоя Рывыж икымше лишемеш:

– ПОУК, каласе, У ий пайремыште эн мотор лияш мом ыштыман?

Кугу экраныште возалтеш: «Йылгыжше лум пырчан тувырым чий да шкендым порылык дене сӱрастаре».

– Хм, тувырым чиём, сита. Порылыкшо эше молан? – ӱрын манеш Рывыж.

Умбакаже Мераҥ йодышыж дене вашка:

– ПОУК, мыланем У ий пайремыште каласкалаш эн чапле почеламутым возен пу. Чыланыштым ӱрыктарынем!

Полышкалыше тунамак почеламутым возен пуа, чапле рифманым, но ий гай йӱштым.

– Мотор, но чондымо. Мый чап-лыракым возен моштем! – пентгын каласа шайыкшинча.

Масканат йодышыжо уло:

– Чапле лум курыкым кузе ыштыман? Кечыгут, эр марте мунчалташ лийже.

Пӱртӱслӱ огыл уш-акыл формулым, чертӱжым ончыктен, кугытшымак возен. Маска ден Мераҥ-влак чыла каласыме почеш ыштат гынат, курык тунамак шӱрын кая да сӱмырла.

Тидым ужын, Тумна кугун шӱлалта да каласа:

– Тугеже полышкалышем чыла пала, но кеч-могай пашам чоным пыштен ышташ кӱлмӱ нерген ок шинче.

Ты йӱдым Тумна чонештен лектеш да кавашке ончалеш. Ончен-ончен, шӱдыр-влак кокла гыч У ийын шомакшым колеш:

– Тыйын шонымашет сай, но юзо шӱлыш код гыч огеш шоч. Тудо поро пашам уло кумылым ыштыше еҥын чоныштыжо ила.

Тумна йонылыш лиймыжым умыла. Шӱлыканеш гынат, эрдене йолташыже-шамычым уэш тумо воктек ӱжеш да ойла:

– Пагалымем-влак, мыйын полышкалышем ушан, шуко пала, но тольык чонжо уке. Тудо ой-каҥашым пуэн кертеш, но юзо шӱлышым лач ме чапана, шулдырна, шӱмна, шыргыжалмына дене веле ыштен сена.



Рывыж шыргыжалеш да ик корзинга мӱгиндым кӱэшт конда. Шинчаже шӱдырла чолгыжеш да, чынжымак, пайремыште эн моторын коеш. Мераҥ эн онгай да чонгыч лекше почеламутым шке возен, чодыраште илыше-влак совым рӱж пералтат. Маска курыкым угыч ямдылен. Схемым ончен огыл, шке шонен, шижын. Тушто кажне кечын эр марте юарлыме йӱк шокта, икте кодде, шер теммеш мунчалтат.

А Тумна ноутбукшым петыра да ПОУК-ым малаш пышта. Ушан машинат тек кана! Вара чайым шолта, сортам ылыжта да эше ик гана каласа:

– Ушан технологийн полышыжо уто огыл. Но юзо шӱлышым чонышкына шке шындарена. Мемнан гай пӱсӱ уш тӱняштыжат уке! Тидым шарныза!

– Чы-ы-ын! – чылан рӱж вапештат.

– Тау тыланет, Тумна. Пӱртӱслӱ огыл уш-акыл нерген ме эше огына пале ыле. Ынде шке ушланна утларак ушанаш, тыйын книгатымат черет дене лудаш тӱн-лына, – таушта чодыра оза, Маска.

У ий йӱдым чодыра гӱжлен. Сӱрастарыме кож йыр янлык-влак сылне мурым муреныт. Кузе гына куштен огытыл?! Кажныже мастарлыкшым ончыктен. Нуным саламлаш Йӱштӱ Кугыза, Лумӱдыр толыныт. Янлык-влакчан чапле пӱлекым кучыктеныт. У идалыкым у куан, у пиял, у шонымаш дене вашлийыныт.

Христина АЛЕКСАНДРОВА.
Сӱретым нейросеть полшымо
дене ыштыме.



Луман ужгам чийыше, упшым упшалше, шовычым пидше пушенге-влак шукертак тамле омо дене малат. Кечын мотор ӱдырла шыргыжал ончымыш годым нуно шийла волгалтат. Пычкемы-шалтмеке, йӱд лишеммеке, шӱдыр-влак тынар лишныла чучыт, кид дене кучаш лиеш, шонет. Телым чылажат мотор.

Чодыраште илыш шолеш. Чыланат У ийым вашлияш ямдылалтат. Ур-влак модыш олмеш кожыш пӱкшыштым, коштымо понгыштым сакалтылат. Мераҥ-шамыч пайрем пушенге воктелан мотор лум орым чонат. У ийым шижын, Шоншо-влакат ик жаплан кыненыт. Нуно ло-кама вондышто кодшо саскам погат. У ий йӱдым тамле чайым йӱктынешт.

Лач Тумна гына тумо кӱргашыж гыч ок лек. Окнаж гыч тул кажне кечын эр марте йӱла, манаш лиеш.

– Тумна мом эре ышта? Ала у книга дене мемнам куандара? – икте-весешт деч йодыныт янлык-влак.

Но Тумна, чынжымак, кӱлешан пашам тӱналын улмаш. Йолташыже-шамычлан келыштарыме пӱртӱслӱ огыл уш-акылым (искусственный интеллект) ышта. Ноутбукшын экранже канде тул дене волгалтеш, процессоржо эркын мӱгыра, наушникше гыч код йонга.

– Теве ужыда, вашке чодыраште ушыжым нигӱ уто гана пудыратылаш ок тӱнал. Йодышым пуэда веле – чечасак вашешта, – семынже кутыра.

Икмыняр кече гыч Тумна чыланыштым кугу пайремышке ӱжеш. Шӱдӱ угла ияш тумышко кугу мониторым пижыктен. Тушто «ПОУК – Ушан полышкалыше» ма-нын возымо.

– Кеч-мом йодса, ПОУК чыла пала, – кугешна Тумна.



Кож модыш

«Шонанпыл» йочасадыште декабрьште «У ий кожлан модыш» ончер ий еда эртаралтеш. Теве Катя Прахт аваже дене пырля изи кожым ыштен, түрлө модыш дене сорастарен (**снимкыште**). Тыгай пашам ышташ пайдале: йоча ден ача-ава кокласе кыл пенгыдемеш, жапым моштен кучылташ туныкта, да у ий шұлышым кажне суртышко пурта.

*Лидия ДРОЗДОВА.
Медведево, У Арбан.
Фотом йочасадын
архивше гыч налме.*

Ший пұртұс

Лум мыняре таче толын
Сылне шочмо ялышкем.
Ах, кычкем вашкен издерым
Да чызем коремышкем.

Ший кочайлан таушталын,
Мый пұртұсым эскерем.
Лумым йырымваш шавалын,
Ерым ий ден петырен.

*Амелия ЛАВРЕНТЬЕВА.
Медведево, Цибикнур.*

Лум пырче

Ош лывыла койын, кава гыч
лум пырче-влакын велмыштым
эскераш моткоч йоратем. Кид-
копаш шинчыт гын, вашке шу-
лен йомыт. Пижышкем тук-
нат – кужу жаплан аралалтыт.
Кок икгайым от верешт. Каж-
ныже ойыртемалтше тұран. Эн
моторжым лишыл енем-влак-
лан ончыктымо шуэш. Мөнгө
пурымеке, альбомышкем вашке
гына сүретлем.

*Ярослава СЕМЁНОВА.
Морко, Арын.*

Юзо пайрем

У ий – моткоч йоратыме
да вучымо пайрем! Тудым
ме кажне ийын еш дене вашли-
йына. Тений ковам деке ялыш
миенна. Ковам конгаште ко-
гылым, мелнам кұэштын,
а йоча-влаклан – шере ұячам.
Ме авам дене түрлө салатим
ыштенна. Кажне ийын ро-
до-тукумлан пөлекым ямды-

лена, мотор кагазеш вұдылын,
кож йымаке пыштена. Пайрем
деч вара икымше кечын коньки
дене коштынна да издер дене
курык гыч мунчалтенна. У ий
дене саламлем! Чылалан пен-
гыде тазалыкым, пиалым, куа-
ным тыланем!

*София ТИМОФЕЕВА.
Волжск, 9-ше номеран школ.*

•Палаш онай•

**9 январь –
өршын кечыже.**

● Öрш-влак кенжежым
чодыраште илат, телы-
лан, кочкышым кыча-
лын, айдеме илемла
деке чакрак толтыт.

● Мотор йошкар онг узо кайы-
кын веле. Ава өршын онг велже
күреналге.

● Нелытше – 30 грамм.

● Түрлө йүкым луктын мошта.

● Емыжын але пызлыгычкын
нөшмыжым кочкеш.

● Пыжашым ава кайык чоҥа.

Узын пашаже – аралаш да
пукаш.



*Кира ДАНИЛОВАН сүретше.
Волжский, Пётзьял.*

•Сүретым чиялтыза.



0+

Марий Эл
Республикысе
«Марий Эл»
увер агентстве» КАУ.
Директор –
Е.И.КУЗНЕЦОВ.
Түн редактор –
А.Н.ГРИГОРЬЕВА.

Индекс П4696.
Тираж 1500 экз.
Заказ
Формат – А-4-8.

Учредитель-влак:
Марий Эл Республикысе Тұвыра,
печать да калык-влакын пашашт
шотышто министерстве,
Марий Эл Республикысе
«Марий Эл» увер агентстве» КАУ.

Редакций да издатель: Марий Эл
Республикысе «Марий Эл»
увер агентстве» КАУ,
424006, Йошкар-Ола,
СССР Вооружённый Вийын 70-ше
идалькыше урем, 20-шо порт.
Тел. 8(8362) 45-22-82.

Газетым редакцийште
погымо да верстатлыме,
«Марий Эл Республикысе
Правительствын
типографийже» ООО-што
ямде оригинал-макет гыч
савыктыме.
Типографийын адресше:
424000, Йошкар-Ола,
Комсомольский урем, 112.

Печатьыш пумы жап –
14-00, фактически – 13-00.

Авторын да редакцийын
шонымашышт түрлө лийын кертят.
Серыш-влак мөнгеш огыт колталт.
Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru
(автор-влаклан)
Сайтын адресше: ямделий.рф

Газетым Кыл, информационный
технологий да массовый
коммуникаций сферым
эскерыме шотышто
федеральный службын Юл кун-
дем федеральный округысо
управленийыштыже
регистраватыме.
Номер – ПИ № ТУ52-01404,
2023 ий 22 сентябрьште пумы.



Теле пагытлан адвент-календарь

